

ETOP EMI ENỌDE ESỌK MKPARAWA

Ecclesiastes 11:9, 10; 12:1-14

ỌYỌHỌ UKPEP-ŃKPỌ 378

Eke Ikpọ Owo

IKỌ IBUOT: “Yak nnyin ikop utit ofuri ńkpọ emi: bak Abasi, nyuñ nim mbet esie: koro emi edi eke kpukpru owo. Koro Abasi eyekot kpukpru ńkpọ emi enamde edi ikpe, ọkọrọ ke kpukpru ndibe-ndibe ńkpọ, edide eti, enyuñ edide mme idiọk” (Ecclesiastes 12:13, 14).

I Eti Item

- 1 Uyen ekpedi ini idara, ikpedighe ini eke edude otime-otime ye idiọk-ńkpọ, Ecclesiastes 11:9, 10; Psalm 119:9; 1 Peter 4:3-5
- 2 Akakan idara emi akparawa enyenede edi nditi Andibọt, Ecclesiastes 12:1; Matthew 18:1-4; Mark 10:14, 15

II Se Ekpekere Ebaña

- 1 Uwem, ediwak ini esikabare edi mbiomo ọnọ akani owo ye owo nnanenyin, Ecclesiastes 12:1-4; Job 3:20-22; Jonah 4:8
- 2 Owo enyene ndika “nsinsi iduñ esie” ke akpatre, Ecclesiastes 12:5-7; 8:8; 2 Samuel 14:14; Mme Hebrew 9:27

III Akpatre Iko

- 1 Ọkwọrọ-ikọ oyom ndinọ mme owo item, Ecclesiastes 12:8-12; Job 28:28; Hosea 14:9; John 20:30, 31
- 2 Utom kpukpru owo edi: “Bak Abasi, nyuñ nim mbet esie,” Ecclesiastes 12:13; Matthew 10:28; Luke 10:25-28; 1 Peter 2:17
- 3 Ubiere-ikpe Abasi eyedomo kpukpru utom owo, Ecclesiastes 11:9; 12:14; Psalm 62:12; Jeremiah 17:10; Matthew 16:27; Eriyarare 20:12

SE EKPEPDE EBAÑA

Ke ema ekefehe mbuba uwem ema enyuñ ekut nte mme utit uwem etiede, Ọkwọrọ-ikọ ke ńwed Ecclesiastes ewet mme ewuhọ emi enọ mkparawa. Ke nda usuñ Spirit Abasi, ema ewet ikọ emi ke ńwed Abasi, ndien etop emi edi nda usuñ ọnọ mkparawa emi esañade ke ọkpọ usuñ uwem.

Eke Mkparawa

Ọkwọrọ-ikọ emi ama ọfiọk ete edieke ini odude emi uwem enyenede inem ke edi ini uyen. Ke utọ ini ntem mfina iduhe ke uwem, ọyọhọ ye inem ye idaresit. Andiwet ńwed emi ikesinke utọ ini emi ke ndek mme ndikpan mkparawa ndinọ idem mmọ mme inemesit eke ini uyen. Enye ikañwanake ndimen itam ikpọ owo nyari mkparawa ke ibuot. “O akparawa, dara ke uyen fo; yak esit fo onyuñ enem fi ke usen emi afo edide akparawa, nnyuñ tiene usuñ esit fo, ye se enyin fo okutde.”

Nte eti item edi oro? Nte ekeme ndiyak akparawa nnọ usuñ esie tutu osim utọ idaha emi? Nte ńkpọ ukpeme edian ikọ item emi: “Edi fiọk ete ke Abasi edikot fi edi ikpe abaña kpukpru ńkpọ emi.” Kpukpru ọkọnọ ke uduak eke akparawa enyenede ke esit esie, oro edinam ekeme ndibuotidem ke mme edinam esie. “Ọtọ nte ńkpọ-uto fo odude, do ke esit fo edinyuñ odu” (Matthew 6:21). Ke ini usuñ owo enende ke iso Abasi, ima esie odu ke mme ńkpọ enyọñ ndien ekikere esie ye mme edinam esie ebe se owo ekemede nditiñ ńkpọ ndian (Kot ńwed Mbon Galatia 5:22, 23). Ndikere mbaña ubiere-ikpe Abasi inamke owo emi ama ọkọbọ erinyaña ndik, koro mme nti utom eyeda nti utip edi. Akparawa emi ayakde ndiọi udọñ ada enye oduk usuñ mbiara enyene ntak ndikere koro mme idiọk-ńkpọ esie eyetiene enye ke edem aka ikpe.

Mme N̄waña Usuñ

Mme mkparawa emi isañake otim oyom usuñ mbemiso mmọ edisim n̄waña usuñ uwem. Inua-otop emi añwañade odu ke n̄kañ ubọk ufien, okpon onyuñ eye ndise, ọyọhọ ye ndiye nsu nsu eñwọñọ emi midighe akpanikọ. Ke esede inua-otop emi, ekeme ndikut n̄nwaña usuñ emi, ke edem mbiba ọyọhọde ye ediwak ndiye n̄kpọ, inem, ikpikpu n̄kpọ ye mme abiaña. Ke akpa enyin, n̄nwaña usuñ emi etie nte mmem-mem usuñ ndisaña, koro enye oto ọsuhọre esisit onyuñ ada ekpri odudu ndisaña ke esit. Ediwak owo ebe ke n̄nwaña inua-otop eduk eyọhọ ke usuñ emi atarade. Mmọ eke esuk ekerede mme itiene iduk ke n̄waña-usuñ emi, satan esida idomo ye etabi uruk onyuñ oduri mmọ esin, ke usuñ oro, koro satan edide ọbọñ ye andikara usuñ oro, ndien enye eyeyom ndinyene ediwak owo eke esukde ibuo enọ ukara esie Edi kpeme! N̄nwaña inua-otop emi ye n̄nwaña-usuñ emi ọsuñọ ke mkpa ye nsinsi nsobo.

Ata ekpri inua-otop odu ke n̄kañ ubọk nnasia emi ndusuk, owo ikwe akpa. Okposuk edi etiede nte una-isọñ, edi ekeda ekọm-urua eke okponde ebọp mfafaha inua otop emi: “Koro Abasi akamama ererimbot ntem, tutu Enye osio ikpọñ-ikpọñ Eyen emi Enye obonde ọnọ, man owo ekededi eke ọbuotde idem ye Enye okutak, edi enyene nsinsi uwem” (John 3:16). Ke owo esede utibe inua-otop emi okut mfafaha usuñ emi. Enye edi usuñ emi ọdọkde obot, ndien ke ntre oyom odudu ndida nsaña ke esit. Ediwak idara ye ata inemesit edu ke usuñ emi, n̄ko edi enye ededibe ke enyin mmọ emi edade enyọñ-enyọñ ese. Owo iwakke ke mfafaha usuñ emi koro ibat ibat owo eduk ke ekpri inua-otop emi. Owo inyike-nyik owo ndisaña ke usuñ oro, edi ekot kpukpru owo ete eduk ke esit ke Uyo Enye emi adade ọkọñ usuñ esit kpukpru owo. Kop Uyo oro! O, kpañ utọñ nọ ikot Spirit nyuñ duk ke mfafaha usuñ, koro mfafaha usuñ ada osim Heaven ye uwem nsinsi!

Ata Mkpe Mbiere

Ewe usuñ ke afo ediduk? Ana nte owo kiet-kiet ebire, edi enye edi ata akpan mkpe-mbiere emi anade nte enam. Ediwak ini akpa n̄kpọ emi esidukde ke esit emi edemerede, esidi ndiyom ndibiat ini ke ndinam utọ mkpe mbiere emi: edi Abasi anam akpanikọ emi ofiop ke esit kpukpru owo, ete ke ndibiat ini edi idiok mkpe-mbiere. Andiwet Ecclesiastes ama otim ọdiọñọ usuñ uwem iba emi, oro esin enye ewet ndinyik mkparawa ete emek eti usuñ ke ini uyen mmọ.

Akparawa ọtọñọ uwem ye esit eke ubiom-ikpe miduhe ndien edieke etimde ekpeme, eyesaña osim Abasi. Edi ke ata ekese ini ke editim ntiñ, ekut idiok usuñ enyuñ etiene. Ibighike emehe ke mme nsio-nsio edu uwem, nte uruk n̄kpañ-utue edinam kiet oduri efen edi. Ke enamde n̄kpọ ini kiet eyom ndinam ọyọhọ ikaba, ndien ọyọhọ ikaba akabare edi mmem mmem akan eke akpa. Edi ọkpọsọñ utom owo ndisiak usuñ ke ikọt, edi nte ekade iso esaña usuñ oro añwana onyuñ emem ndisaña.

Ke nditim ntiñ, tọñode ke uyen tutu osim isua 25 me 30, edi mme isua emi edade ebọp ido ye mme edu uwem enim enọ mme isua uwem emi ọsuhọre. Uyen edi ini emi ekemedede ndida nam n̄kpọ, ukem nte ekemedede ndida ukwak emi efọpde ke ikañ. Ke ekpri ini esisit ukwak emi ekenamde ke ido nte ekeyomde akabare ọsọñ eti-eti. Kpasuk ntre, mme ido emi ekekepepe ke ini uyen ọsọñ ada, onyun ọsọñ eti eti ndikpuhọre.

Unana Abasi Ke Ini Usọñ

Sia mme n̄kpọ emi edide akpanikọ oro esin Ọkwọrọ-ikọ okot akparawa ete: “Nyūñ ti Andibot fi ke ini afo edide akparawa, ke ini ukut mika-idighe kaña, ke mme isua eke afo edidọhọde ete, N̄kwe inem ke esit, mika-isimke (fi).” Enye ọnọ uwut-n̄kpọ emi abañade akani eren emi ekesinde ndinam n̄kpọ nọ Abasi ke ofuri ini uwem esie tutu osim idaha emi enye etiede ebet mkpa ndimen enye nsio ke isọñ mme andidu uwem. Edi akpanikọ nte ke owo emi, nte ekese mbon efen, ama okop ikot Abasi ke abaña edinen ido ini kiet ko, ndien ndusuk ama aduak ndinam n̄kpọ Abasi ke ini iso, edi idaha emi enye ikemeke aba ndikere mbaña utọ akpan n̄kpọ emi.

Kpukpru usen ekedi n̄kim-n̄kim ke eyo usọñ owo emi; utin, ọfiọñ mme ntanta-ọfiọñ ikoduhe ndinam mme usen esie eyama. Ukpeme eke otode Andibot ikoduhe; enyin esit esie ama okim; udia inyeneke aba inem, koro edet edisuhọ ibat ibat, ndien ndikok udia akabare edi ọkpọsọñ n̄kpọ; itimke isọp ikop n̄kpọ aba; idap efehe ọkpọñ enyin esie; mme ikpọ itie akabare edi n̄kpọ ndik.

Usuñ mkpa ama ekpere, ndien mme atua eyet esaña mfuhọ mfuhọ ekanare mme efak obio. Mkpa ada itie ndien owo emi aka “nsinsi iduñ esie.” Ntan eyefiak ke ntan, kpa nte ekedide: spirit eyefiak etiene Abasi emi ọkọnọde enye, man ekekpe ikpe esie nte ekemde ye se enye akanamde ke ikpọhidem. Nte owo etiede ndikere se ikọ ọkwọrọ-ikọ emi ọwọrọde, ekeme ndikut ñkpọ mfuhọ ye ntọt eke enọde. Edieke akani owo emi okpokoyomde Abasi ke ini uyen esie, onyuñ anamde ñkpọ ọnọ Enye ke ofuri ini uwem esie, mme akpatre usen uwem esie ekpeketre ye idara.

Ke Christ

Mkpa emi miyọhọke ye ọkpọsọñ ndik edi ukpep-ñkpọ emi spirit añañade ndinuk nsin ke esit ñkpri ye ikpọ owo ukem-ukem. Ekeme ndifiak ntiñ akpanikọ emi, nte ke edieke owo odude eti uwem ke enye eyekpa eti mkpa, edide akparawa mme onyuñ edide akani owo. Andiwet ñwed emi, sia ama okosobo ye ediwak ikpikpu ñkpọ uwem emi, onyuñ otim ọfiok se uwem oyomde, oyom kpukpru owo edu eti uwem. Enye ekpep mme owo ifiok, onyuñ eneñere ewet ikọ akpanikọ. Ke etimde ekama. Ikọ emi ekedade odudu Abasi ewet eyenam owo asaña ke usuñ emi akade Heaven, onyuñ otim ọsọñọ ada ke akpanikọ nte enye okutde.

Ke otu mme utibe-ñkpọ emi odude ke ererimbot, edi akani owo emi osuk odude uwem ke ifiok mbuotidem ke Christ Jesus. Ekeme ndidi mme udọñ obukidem ama otim osuhọre man ekem ke ndise emi, edi uwem esie idighe ukpọk. Mme usen esie ọyọhọ ye idorenyin ndisọp nsobo ye Ọbọñ. “Eridu uwem ọwọrọ Christ ọnọ mi, erikpa mkpa onyuñ ọwọrọ udori” (Ñwed Mbon Philippi 1:21). Edinen owo ikopke ndik mkpa: “O mkpa, erikan fọ enye? O mkpa, ifọt fọ enye? . . . Yak ekọm enyene Abasi, emi ọnọde nnyin erikan, oto ke Ọbọñ nnyin Jesus Christ” (1 Ñwed Corinth 15:55, 57).

Utiti

Eda ñwed ewuhọ emi edisim utiti ye mkpọsọñ ikọ emi owo akpatatde ọnọ idem esie. “Yak nnyin ikop utiti ofuri ñkpọ emi: bak Abasi, nnyuñ nim mbet esie: koro emi edi eke kpukpru owo.” “Bak Abasi,” oro ọwọrọ ete kpono nnyuñ tuak ibuot nọ Abasi. Emi edi utom kpukpru owo, oro edi akpa ye akpam ñkpọ emi owo ekpesinde ifik ndinam. Me edi enyene ñkpọ owo, me edi ubuene, me odu ke ñkoñkoñ itie, me odu ke usuhọre itie ke enyin mme owo, oro inamke ñkpọ, koro mme ñkpọ emi edu ke otu mme ñkpọ emi edibede ifep. Mme inyene emi etode edinen ido ke esit owo eyedu ke nsinsi.

Ndisọñọ akpan ñkpọ emi odude ke owo ndibieme ndida ke ñkañ edinen ido, efiak etiñ akpanikọ emi abañade ubiere-ikpe. “Koro Abasi eyekot kpukpru ñkpọ emi enamde edi ikpe, ọkọrọ ke kpukpru ndibe-ndibe ñkpọ, edide eti, enyuñ edide mme idiok.” Edieke mme ikọ ọkọnọde owo eti ibuot, enye emi ọkọnọ. Ndisuk ñka iso ke ndinam idiok edi idat ke ñkañ spirit. Akparawa añañ mme eren emi enyenede eti ibuot ndikere ñkpọ, emi ama ọkọfiok akpanikọ Abasi ke abaña ubierikpe esie ye se inade ibet mme idiok owo ke utiti, eyefiok ata akpan ñkpọ kiet emi ke uwem: “Bak Abasi, nyuñ nim mbet esie: koro emi edi eke kpukpru owo.” Idahemi edi eti ini ndinam se ifọnde; idahemi edi eti ini nditọñ ndisaña ye Jesus Christ, edieke oro mikedighe usuñ fọ kaña.

MME MBUME

- 1 Nso item ke andiwet Ecclesiaste ọkọnọ mkparawa?
- 2 Nso ke ekenọ mkparawa nte adaña ke edifehe mbine mme udọñ itọñ mmọ?
- 3 Nso idi ntak emi ọfọnde eti eti nditi Andibot ke ini uyen?
- 4 Nso idi ntak emi ekotde mkpa “nsinsi iduñ” owo”?
- 5 Nso idi mme nsio-nsio itie emi ikpọhidem ye spirit owo ekade ke mkpa?
- 6 Siak mme nsio-nsio usuñ emi Ọkwọrọ-ikọ akamade ndida nnọ mme owo item?
- 7 Nso ikedi akpatre item ke ukpep-ñkpọ emi ke abaña akpan utom emi owo enyenede ndinam?
- 8 Ewe mbet Abasi anam ikọ emi edi ata akpan ñkpọ?